

L'é romanc l venjidor de Suns Europe 2017

Thomas Cathomen se à prejentà a Udin con l'inom de si projet "Tumasch è" vadagnan l maor consens anter juria e public



La premiazion de "Tumasch è" da pèrt de Sabrina Rasom, vizepresidenta del NPLD. (foto: Andrea Tomasin)



L moment finèl de SUNS Europe 2017, con duc l artisc sun paladina endèna che l venjidor, l romanc Thomas Cathomen, cianta endò "Jeu sai buc".

Musega e mendranzes - L Friul, con l'esperienza emportanta de produzion musicala ti lengac de mendranza, con l'anteverde e la gaisa de Radio Onde Furlane, con la coprativa Puntozero, l sostegn de l'ARLEF e de altra istituzions e con l didament de n bel schiap de voluntadives, se à confermà te chisc dis passé la capitala europeina de la performances artistiches ti lengac mendres.

Dò trei dis de momenc e evenc artistich e culturèl, en sabeda ai 2 de dezember tel gran Teatro Nuovo Giovanni da Udine fè stat l'clou, con la terza edizion internazionèla del festival Suns e ence chest'outa fè stat n gran spettacol. Con la prejentazion feruscola e gustégola de l'ormai cognosciù Michele Polo, compagnà chest'outa da la brava Natalie Norma Fella, se à esibì su la paladina del "teatron", pien de jent, l grop Adwauth dal Galles, l Esposa da la Galizia, lsa Zwart da la Bassa Sassonia, Ebel Elektrik da la Bretagna, Tumasch è dai Grijons, La Basu dal Palisc Basch e Franco Giordani dal Friul. Sonoritèdes pop lurèdes con l'eletronica se à enterzà a rock dur, proponetes deldut

originèles, sperimentazions trefèdes e cianties de autor, dat leà dal fil ros di lengac mendres de l'Europa.

L'atenzion del public se à smaorà amò de più canche l contest ge à lascià l post ai ghesc spezièl, endèna che la juria fajea sia valutazions.

L "clou" galeis Gruff Rhys à encuriosì con na performance vocala deldut particulèra l public, che no cognoscea sia longia cariera de autor, muzist, regist e produtor de documentaries, che ge à fat vadagnèr l pest spezièl a la cariera. De gran empat ence l esibizion de Namgar, ciantarina da la Buriatia (vejin a la Mongolia), che con sie grop e con strumenc e ousc fora de anter à portà sonoritàdes sciamaniches e deldut particulères.

Ma l'acort se à fat total e la comozion à tocà l pont più aut canche sun paladina, sot l striscion con scrit "No Esteu Sols", se à prejentà la catalana Joana Gomila, che à fat scutèr e compagnà con fioridures vocales da marevea la registrazion de oujes sciantives de eles che lura te ciamp te la Catalogna. "No siede sol, fèra l messaje che volaane ge dèr a duc i catalans - à dit Carli Pup, president de Informazione Friulana (editora de

Radio Onde Furlane). - L nosc fè n festival artistich, ma no se desmenton mai di deric de duc i popoi".

Dò chesta esibizion fè ruà l moment de la premiazion, coi venjidores vegnui fora da la combinazion anter la votazions del public e cheles de la juria, con a cef l frison Onno Falkena.

Sul "podie" virtuel fè ruà dassen trei proponetes de eccezion: al terzo post chela basca de La Basu, che à combinà con originalità e braura stii desferenc, al secondo i Ebel Elektrik da la Bretagna, sonadores dassen de gran valuta, sordadut l chitarist, e al prum post l romanc Thomas Cathomen, che se à prejentà a Udin con l'inom de si projet "Tumasch è" e la ciantia "Jeu sai buc". "Là ciantà e sonà na vida doucia e delicata, crean con movimenc picol e scempies na vera magia - à dit Falkena".

Thomas Cathomen l sona, l cianta e l scrif cianties ence per romanc da passa 15 egn e so nef projet "Tumasch è" fè en equilibre anter rock, pop e cianzon d'autor e a ciaval anter Europa e Americhe, anter i Grijons e l Messich. Premià da la vizepresidenta del NPLD, la fascèna Sabrina Rasom,



L galeis Gruff Rhys l se à vadagnà l pest spezièl a la cariera.

Thomas l'ha encantà l public ence per l fèr tel medemo temp scempies, sciantif, ironich e de gran ferstont che l'ha moscià tel se prejentèr e tel rejonèr sun paladina coi prejentadores. Segur na gran persona, coche conferma la testimonianza del diretor artistich de Suns, l "mitich" Leo Virgili. "Aldelà del giadizie artistich - à dit Virgili - me piès sottrissèr che chesta edizion, olache desche semper l livel musical è stat autiscim, è stata venta da la persona che, anter l'auter, la è stata

bona de creèr i leames più bie con duc e che l'ha entenù de più l spirit de Suns Europe".

N compliment donca a duc i artisc e un amò maor ai organisadores de Suns Europe, con la speranza che l'an che vegn la Ladinia posse endò endrezèr na selezion de chest bel contest, l più emportant a livel european per la mendranzes linguistiches.

Lucia Gross